

先德餘香

南條文雄編集

圓山宴詩稿

六月十三日集

是歲己未夏、龜洲講師、依舊興、方來大衆、共遊東山第一樓、卽吉水大師舊蹤也、此日坐客觸興、唱和頗多、余雖未閑詩、因諸子請、聊賦五絕云、

宣明

夏日東山上、尋蹤第一樓、清風忘坐久、深愛寶池幽、

謹和龜洲講師瑤韻

山樓景色覆皇畿、亦是高吟待月暉、德化壯哉千里外、祇林凝翠繞禪扉、

謹次故香醉講師玉韻

六月十三日、共登雲外樓、金杯期再會、綵筆接交遊、佳木蔚然秀、瑤池瀉出流、滌塵同入室、恩遇總難酬、

圓山讌集

洞水

良友圍碁倚玉樓、東山秀色望悠悠、子聲終日忘塵世、人道神仙窟裡遊、

同

文海

登陟東山閣、披襟爽氣通、天開三面綠、檐冷四邊風、分席詩神逼、含杯俗累空、不知沈醉裡、斜

照石欄紅、

同

法運

陪師勝境共攀緣，高閣巍々天闕邊，泉接葛原名已大，山依花頂嶺相連，檐前吟賦潛魚躍，堂下開樽落日懸，偏喜風烟斯地遍，眼中詞客興悠然，

同

玄同

高樓詩酒此連留，六月東林夏景幽，巖際流泉忘暑熱，檻前風竹怪涼秋，披襟共語傳燈志，握手同觀負笈遊，借問圓山他日會，誰將學術起中州，

又

樓臺峴帆駕雲端，萬象依然指掌看，詩賦共誇今日會，友盟同續昔年歡，都城天敞千秋色，林壑風迴六月寒，更有清涼界中思，不知西嶺夕陽殘，

同

深念

同侶登高閣，憑欄興自幽，波濤群嶺疊，素練一川流，綺席薰風起，葛衣涼氣浮，此間宜避暑，身訝在滄洲，

同

惠恩

僊臺峴帆白雲中，法侶坐疑天帝宮，談理共誇支遁論，裁詩自許惠休工，窓前日落炎蒸退，溪曲風生涼氣通，相對披襟宜盡醉，明年此會與誰同，

又

東山第一室，玉樹鬱芊芊，雲覆三層閣，風涼四面椽，遙臨祇苑樹，近見鎮公泉，乘興開樽酒，吟

詩競後先、

同

義龍

清歡窺講暇、法侶會東山、位置隨僧臘、獻酬依署班、寧同長夜飲、聊得暫時閒、便欲題新賦、斜陽在樹間、

又

披襟把酒倚層樓、盛夏涼風颭似秋、紫翠晴浮龍谷樹、炎蒸洗去鳴河流、何圖此日支公侶、却作當年謝傳遊、更自西窓回首望、洛都形勝滿雙眸、

同

義諦

夏日林園事々幽、如雲騷客宴樓頭、共忘苦熱論詩賦、都是風流塵外遊、

同

亮惠

虎丘之北渭川東、百尺高樓傍碧空、佳客壯遊除溽暑、衆賓臨眺喚清風、浮圖南聳青山外、宮闕西連落日中、共對四邊晴景趣、狂歌縱飲興無窮、

同

亮空(後爲擬講)

尋幽探勝洛東山、山閣晴來物色閒、此境神仙遊履處、座中詩就出塵寰、

又

山閣崢嶸倚吉泉、蒼々玉樹繞樓前、含杯和樂詩中趣、此會不知又幾年、

同

大雲

芙蓉高閣倚嶙峋、此地從來絕俗塵、樹密衣巾涼已動、天晴河嶽望愈新、同人乘興樽難盡、終日

談玄語自真、共說雄風堪作賦、詞才何減楚臺臣、

同

開藏

百尺樓臺倚翠微、偏看下界白雲飛、雄風坐上驅炎熱、不覺西山到落暉、

同

猶龍

景富東山古梵臺、登臨此日絕塵埃、披襟爭擬雄風賦、縱飲頻傾避暑杯、龍谷慈雲含雨起、帝城佳氣入欄開、晚來猶爲耽高興、茶飯依然未得回、

(嗣出)